



«Այբ» ավագ դպրոց

ԳՐԱԿԱՆՈՒԹՅՈՒՆ

Քննաշրջան՝ 2024 թ., ապրիլ  
Տևողություն՝ 1 ժամ 15 րոպե  
Հավելյալ նյութ՝ Պատասխանների գրքույկ

### ՈՒՇԱԴԻՐ ԿԱՐԴԱԼ ԱՅՍ ՈՒՂԵՑՈՒՑՑԸ

Անհրաժեշտ է հետևել *Պատասխանների գրքույկի* կազմին գրված ցուցումներին:

Գրել մուգ կապույտ կամ սև գրիչով:

Պետք է պատասխանել **բոլոր** հարցերին:

Քննության վերջում բոլոր թղթերը հավաքել և հանձնել մեկ տրցակով:

Յուրաքանչյուր հարցի հնարավոր առավելագույն միավորը նշված է հարցի վերջում՝ աջ կողմում:

Հարցերի միավորների ընդհանուր քանակը **32** է:

Այս փաստաթուղթը բաղկացած է 4 տպագիր էջից:

## Առաջադրանք 1

Միրելի՛ դիմորդ, ստորև ներկայացված է մի հատված Փավստոս Բուզանդի «Հայոց պատմություն» աշխատությունից: Ընթերցի՛ր այն և պատասխանի՛ր հարցերին:

Ապա Շապուհ թագավորը հրաման է տալիս իր սենյակի հատակի կեսի վրա շաղ տալ Հայաստանից բերած հողը և վրան ջուր ցանել, իսկ մյուս կեսը թողնել բնիկ երկրի նույն հողը: Եվ հայոց Արշակ թագավորին բերել տվեց իր առաջ և մյուս մարդկանց հրամայեց հեռանալ և, նրա ձեռքից բռնած, ճեմելով շրջում էր: Սենյակում երթնեկելիս, երբ ճեմում էին պարսկական հողի վրա, ասաց նրան. «Արշակ թագավոր Հայոց, դու ինչո՞ւ ինձ թշնամի եղար, ես քեզ որդու նման սիրեցի, կամեցա աղջիկս քեզ կնության տալ և քեզ ինձ որդի դարձնել, իսկ դու իմ դեմ խստացար, ինքնակամ, հակառակ իմ կամքի, ինձ թշնամի դարձար և ահա ամբողջ երեսուն տարի ինձ հետ պատերազմեցիր»:

Արշակ թագավորը ասում է. «Մեղանչեցի և հանցավոր եմ քո առաջ, որովհետև ես եկա, քո թշնամիներին հաղթեցի ու կոտորեցի և հույս ունեի քեզանից կյանքի պարգև ստանալ, բայց իմ թշնամիները ինձ մոլորեցրին, քեզանից վախեցրին և փախչել տվին: Եվ երդումս, որով քեզ երդվեցի, ինձ քո առջև բերեց, ես հիմա քո առաջ և քո ձեռքում եմ, ինչպես ուզում ես վարվիր ինձ հետ, եթե կամենում ես, սպանիր, որովհետև ես շատ հանցավոր եմ քո առաջ, մահապարտ եմ»:

Շապուհ թագավորը, նրա ձեռքից բռնած, շրջում է ճեմելով, անմեղ ձևանալով բերում է հայկական հող շաղ տված հատակի վրա: Իսկ երբ Արշակը այն տեղն է հասնում, հայկական հողի վրա ոտք է դնում՝ սաստիկ ըմբոստանալով, հպարտանալով լեզուն փոխում է, սկսում է խոսել և ասել. «Հեռո՛ւ ինձանից, չարագոբրծ ծառա, որ տերերիդ վրա տեր ես դարձել, և ես չեմ ների քեզ և քո որդոց իմ նախնիների վրեժը և Արտավան թագավորի մահը: Որովհետև այժմ դուք՝ ծառաներդ, մեր՝ ձեր տերերի բարձն էք հափշտակել, բայց ես չեմ թույլ տա այդ, մինչև դարձյալ մենք մեր տեղը չգրավենք»:

Շապուհը դարձյալ, նրա ձեռքից բռնած, տանում է պարսկական հողի վրա, այն ժամանակ Արշակը զոջում է ասածների համար, խոնարհվում է, նրա ոտքերն է ընկնում, սաստիկ ափսոսում, զոջում է ասածների համար: Իսկ երբ ձեռքից բռնած տանում է հայկական հողի վրա, առաջինից ավելի խիստ է խոսում: Նորից հեռացնում է այդ հողի վրայից, սկսում է խոսքերով ապաշխարել:

Հարց 1 Ինչպե՞ս է կոչվում 5-րդ դարը (1 միավոր):

**5-րդ դարը կոչվում է Ոսկեդար:**

Հարց 2 Ո՞վ է Փավստոս Բուզանդին նախորդող պատմիչը և ինչի՞ մասին է նա գրել (2 միավոր):

**Բուզանդը ժամանակագրորեն շարունակել է Ագաթանգեղոսին, ով իրենից առաջ գրել է Հայաստանում քրիստոնեության մուտքի, Տրդատ Մեծ արքայի և Գրիգոր Լուսավորչի գործունեության մասին մինչև նրանց մահը:**

- Հարց 3 Պատմական ի՞նչ ժամանակաշրջան է ընդգրկում Փավստոս Բուզանդի «Հայոց պատմություն» երկը և ինչպե՞ս են կոչվում գրքի գլուխները (2 միավոր):
- Փավստոս Բուզանդի գիրքն ընդգրկում է 319-384 թվականների 65 տարվա պատմությունը՝ Տրդատ Մեծի որդի Խոսրով Կոտակից մինչև Հայաստանի առաջին բաժանմանը հաջորդող տարիները: Նրա գրքի գլուխները խորագրված են «Բյուզանդարան պատմություններ»:
- 1 միավոր - երկի պատմական ժամանակաշրջանը
- 1 միավոր - աշխատության գլուխների խորագիրը
- Հարց 4 Ո՞րն է հայրենի երկրի հողի ու ջրի խորհուրդը: Ինչո՞ւ է Արշակ թագավորը իրեն ավելի զորեղ զգում հայրենի հողի ու ջրի վրա (2 միավոր):
- Բուզանդի համար կարևորագույն արժեքներ են՝ հայրենիքը, պետականությունը, հավատն ու եկեղեցին, որոնց դեմ գնացողը կամ անտեսողը պատժվում է: Պատմական անձերը, լինի թագավոր, զինվոր, թե հոգևորական, առաջին հերթին պետք է հավատարիմ լինեն իրենց առաքելությանը, նվիրված լինեն հայրենիքին ու պատրաստ լինեն զոհաբերության: «Արշակ և Շապուհ» ավանդագրույցի մեջ տեսնում ենք, որ հայրենի հողը նույնիսկ Հայաստանից հեռու ուժ է տալիս պարսկական զերության մեջ հայտնված Արշակ թագավորին:
- Հարց 5 Մեկնաբանի՛ր Արշակի եւ Շապուհի հարաբերությունները պատմական տեսանկյունից: Ինչպիսի՞ն են եղել Հայաստան-Պարսկաստան հարաբերությունները տվյալ ժամանակաշրջանում: Շարադրի՛ր կարծիքդ հիմնավորումներով (5 միավոր):
- Պատմական հերոսները Բուզանդի պատմության մեջ լիարյուն մարդիկ են, կամ գրական կերպարներ իրենց քաջությամբ ու վախերով, հերոսականությամբ ու նենգությամբ, սիրով, խանդով, դավաճանությամբ: Պարսից Շապուհ արքան ցանկանում էր հայոց Արշակ թագավորի հետ խաղաղություն և մեծ բարեկամություն հաստատել և այդ նպատակով իր մոտ է կանչում Արշակ թագավորին: Արշակ թագավորը չի ցանկանում ընդունել հրավերը, սակայն բախվում է հայոց զորքի դժկամությանը: Շապուհը հայոց արքայի մտադրությունները ստուգելու համար դիմում է հողին ջրի խորհրդին: Արշակ արքան ըմբոստանում է, և այդ ժամանակ պարսից Շապուհ թագավորը հրամայում է երկաթե շղթաներով կապկպել Արշակին և տանել Անհուշ բերդը: «Արշակ և Շապուհ» ավանդագրույցը մի դրվագ է հայերի՝ Պարսկաստանի բռնակալական կարգին ու իշխանությանը չենթարկվելու, դրա դեմ ընդվզելու պատմությունից:
- Հարց 6 Հատվածի համար գրի՛ր ամփոփում. քո բառերով շարադրի՛ր, թե ինչ է ասվում այդ հատվածում: Ամփոփման մեջ ներառի՛ր նաև քո մեկնաբանությունը 5-6 նախադասությամբ (5 միավոր):

Ազատ շարադրանք

**Առաջադրանք 2**

Միրելի՛ դիմորդ, ընթերցի՛ր Միսաք Մեծարենցի «Աքսախաներու շուքին տակ» քանաստեղծությունը և պատասխանի՛ր հարցերին:

Ծաղիկներեն հուշիկ թերթեր կը թափե  
Բուրումներով օծուն հովիկն իրիկվան,  
Հոգիներուն կ'իջնե երազ մը բուրյան,  
Ի՛նչ հեշտին է մըթնշաղն այս սատափե:

Աքսախաներ, գինով լույսե ու տապե,  
Օրորվելով մաքուր շունչ մը կը հեան.  
Մինչ կը ձյունե ծաղիկն իրենց հոտևան՝  
Ձոր խոլաբար հովը գրկել կը շտապե:

Ու լույսն անոնց, անխոս հուրի՛ դյուրական,  
Հըմայագեղ ու վարսքերով արծաթե,  
Շատըրվանին կ'իջնե գուռին մեջ կաթե:

Ջուրը ցայտքեն ծաղիկ ծաղիկ կը կաթե.  
Վըճիտ, ինչպես լույսե արցունքը մանկան,  
Նըվագն անոր կը հեծեծե հեշտական:

Ծաղիկներեն հովը թերթեր կը թափե...

Հարց 1 Նշի՛ր Միսաք Մեծարենցի ծննդավայրը (1 միավոր):

**Միսաք Մեծարենցը ծնվել է Խարբերդի նահանգի Բինկյան գյուղում:**

Հարց 2 Թվարկի՛ր Միսաք Մեծարենցի քանաստեղծական ժողովածուների վերնագրերը (2 միավոր):

**Միսաք Մեծարենցի երկու ժողովածուներն են՝ «Ծիածան» և «Նոր տաղեր»:**

Հարց 3 Բանաստեղծությունից դու՛րս գրիր երեք տարբեր պատկերավորման միջոցի օրինակ՝ դիմացը նշելով տեսակը (3 միավոր):

**Սատափե մթնշաղ – մակդիր  
Հոգիներուն կ'իջնե երազ մը բուրյան - փոխաբերություն  
Վըճիտ, ինչպես լուսե արցունքը մանկան - համեմատություն**

Հարց 4 Մեկնաբանի՛ր, թե ինչպես են կառուցվում փոխաբերական պատկերները: Ներկայացրո՛ւ քանաստեղծական տների կապակցման եղանակը (4 միավոր):

**Բանաստեղծության յուրաքանչյուր տան մեջ բնության պատկերները շարժման ու զարգացման մեջ, որոնք արտացոլում են մարդկային հույզերն ու ապրումները: Բնության**

տեսարաններն իրար են հաջորդում փոխաբերական պատկերների փոփոխությամբ, որին նպաստում են բանաստեղծական տան՝ առաջին և չորրորդ, ինչպես նաև երկրորդ և երրորդ տողերի հանգավորումները:

Այսպես՝ առաջին տան մեջ «կը թափե» և «սատափե», «իրիկվան» և «բուրյան» բառերի հանգավորմամբ մի կողմից գծագրվում է բնապատկերների շարժուն ընթացքը իրական և կենդանի գունդերանգներով: Մյուս կողմից՝ փոխաբերություն-պատկերները կենդանացնում են բանաստեղծի հոգեկան աշխարհն ու ապրումները:

Երկրորդ և երրորդ տան հանգավորումների միջոցով շնչավորվում է ողջ բնությունը: Փոխաբերական պատկերներում աքսախաները կերպավորվում է որպես ձյունի փաթիլներ և հուրիներ, իսկ հովը՝ նրանց սիրահարը:

Միրային տրամադրության ստեղծմանն ու ծավալմանը նպաստում են առաջին և վերջին հատվածում կրկնվող «Ծաղիկներեն հուշիկ թերթեր կը թափե/Ծաղիկներեն հովը թերթեր կը թափե...» տողերը:

Հարց 5 Բացատրի՛ր, թե ինչպես են բնության երևույթները անձնավորվում «Աքսախաներու շուքին տակ» բանաստեղծության մեջ: Ինչպիսի՞ պատկերներով են ներկայացվում աքսախաները: Ի՞նչ գործառույթներ ունեն բնապատկերները (5 միավոր):

Մեծարենցի ստեղծագործության մեջ բնության պատկերումը մի կողմից բնապաշտական երանգ ունի, այսինքն՝ ընթերցողին փոխանցվում է բնության հանդեպ ունեցած հիացումը, ամեն մանրուքը նկատելու ու գնահատելու մեծարենցյան նուրբ զգացումը, մյուս կողմից՝ այն խիստ խորհրդանշական է. բնապատկերները մարդկային հույզեր ու զգացումներ են թաքցնում իրենց խորքում: «Աքսախաներու շուքին տակ» բանաստեղծությունը զով երեկոյի մի գեղեցիկ պատկեր է, որտեղ հովն ու աքսախաները շնչավորվում են, ձեռք բերում այսպես ասած սեռականություն: Եթե աքսախան կերպավորվում է որպես հուրի՝ կանացի նրբագեղությամբ, ապա հովը կարծես նրան գրկել ցանկացող սիրահար է: